

## Qarasaasiakkut kasinortitisineq pillugu nalunaarut

Pinnguaatit pillugit inatsimmi nr. 848, 1. juli 2010-meersumi § 36, imm. 2, § 41 aamma § 60 aamma pinnguaatit aalajangersimasut pillugit Kalaallit Nunaanni inatsimmi nr. 223, 22. marts 2011-meersumi § 17, imm. 2 § 19 aamma § 46 malillugit aalajangersarneqarpoq:

### Kapitali 1

#### *Atuuffia*

§ 1. Nalunaarut qarasaasiakkut kasinortitsinermik ingerlatsinermut atorneqarpoq, tak. pinnguaatit pillugit inatsimmi § 18 aamma pinnguaatit aalajangersimasut pillugu Kalaallit Nunaanni inatsimmi § 7.

*Imm. 2.* Pinnguaatit pillugit inatsimmi § 42, imm. 5 aamma pinnguaatit aalajangersimasut pillugu Kalaallit Nunaannut inatsimmi § 8, imm. 1-imi taaneqartut qarasaasiakkut kasinortitsinermik ingerlatsinermut akuersissutit nalunaarummut ilaatinneqanngillat.

### Kapitali 2

#### *Aningaasanoortartut nalunaarsugaaneri il.il.*

§ 2. Qarasaasiakkut kasinortitsinermi peqataaniarluni aningaasanoortoq akuersissummik piginnittumi pisisartutut nalunaarsorsimassaaq. Akuersissummik piginnittutut paasineqarpoq qarasaasiakkut kasinortitsinermut ingerlatsinissamut akuersissummik piginnittoq.

*Imm. 2.* Inuit timitallit kisimik pisisartutut nalunaarsugaasinnaapput.

*Imm. 3.* Akuersissummik piginnittoq imm. 4-9, § 3 aamma § 4 naapertorlugit pisisartumut ilisimannittuussaaq, aamma tassunga ilanngullugu piumasarissallugu nalunaarsorneqarnermut atasumik pisisartuq kinaassutsini uppersarsinnaassallugu.

*Imm. 4.* Akuersissummik piginnittup pisisartup kinaassusia pillugu paasissutissanik pissarsiniassaaq, tassunga ilanngullugit aqqa aamma CPR-normu, imaluunniit pineqartoq CPR-normoqanngippat paasissutissat assigusut. Paasissutissat pissarsiarineqartut pisariaqartumik uppersarsaanikkut uppersarneqassapput. Uppersarsaanerup annertussusia annaasaqariataarsinnaanermik nalilersuineq aallaavigalugu aalajangersarneqassaaq, taamaalilluni akuersissummik piginnittup qularinagu pisisartuq inuk tassaasoq pisisartutut taannaanerartuq.

*Imm. 5.* Akuersissummik piginnittup pisisartutut nalunaarsugaanermut piumasarissavaa pisisartup taamaallaat imminut sinnerluni iliuseqartussaana.

*Imm. 6.* Pisisartup kinaanera pillugu paasissutissat pissarsiarineqartut naammannersut qularutigineqalerpata kinaassutsip nutaamik uppersarneqarnissaa piumasarineqassaaq.

Aamma taamaappoq nuussineq pinerlunnikkut aningaasarsiat aningaaserivimmut inissinneqarsimasunut imaluunniit qunuseriarinninnikkut aningaasalersuinermit atassuteqartut pasitsaassisoqarpat.

*Imm. 7.* Akuersissummik piginnittoq pisisartup pinnguaatinik aningaasannanniarnissaata annertussusissaa pilugu paasissutissanik pissarsiniassaaq.

*Imm. 8.* Akuersissummik piginnittoq:

- 1) nunami allami najugaqarluni aningaasanoorniartoq politikikkut malersugaanersoq pillugu, tak. imm. 9, aalajangiinissamut naammattunik suleriaaseqassaaq,
- 2) pisisartumik taamatut ittumik nalunaarsuinermit ulluinnarni aqutsisut akuersissutaannik pissarsiniassaaq,
- 3) aningaasanoornermik ingerlataqarnermit ilaasunik pisuussutinut isertitanut pissarsiffiit pillugit paasissutissanik pissarsiniarnissamut naammaginartunik aaqqiisimassaaq, aamma
- 4) pisisartumut atassuteqarnermit ingerlaavartumik alaatsinaassalluni.

*Imm. 9.* Politikikkut malersugaasut, tak. imm. 8, inunnit aamma inatsisitigut pisinnaatitaasut pisussaataasullu kiisalu tunisassiat suut pinerlunnikkut aningaasarsiat aningaaserivimmut inissinneqarsimasunut imaluunniit qunuseriarinninnikkut aningaasalersuinermit pitsaaliuilluni aaqqiinerit pillugit inatsimmiit ilaatinneqannginnissaat kiisalu politikikkut inuit malersugaasut nassuiarneri § 4-mi pillugit nalunaarummi nr. 712, 1. juli 2008-meersumi nassuiaatit naapertorlugit paasineqassapput.

**§ 3.** Kinaassutsimik uppernarsaanerup suliarineqarnera akuersissummik piginnittup pisisartumut pissutsinik pilersitsineranut atatillugu kingusinnerpaamillu akiliinerup siulliup naammassineqarnissaa sioqqullugu naammassineqassaaq, taamaattorli tak. § 7.

**§ 4.** Pisisartumut pissutsit ingerlaavartumik nakkutigineqassapput aningaasanoortarnerup annertussusia, tassunga ilanngullugit nuussinerit ataasiakkaat, akuersissummik piginnittup pisisartoq pillugu ilisimasaqarneranut naapertuunneri qulakkeerniarlugit, tassunga ilanngullugit aningaasanoornissap annertussusissaa mannaluk tikillugu aningaasanoortarnerup pissusia. Tamatumunnga atatillugu pisariaqassappat aningaasat pinngooqaarfii pillugit paasissutissanik ujartuisoqassaaq. Allagaatitut uppernarsaatit, nalunaarsukkat aamma pisisartoq pillugu paasissutissat allat ingerlaavartumik nutarterneqassapput.

### Kapitali 3

#### *Kinaassutsimut uppernarsaatit il.il. toqqortarineri*

**§ 5.** Akuersissummik piginnittup nalunaarummut ilaasut aningaasanoortartoq nalunaarsugaasoq pillugu kinaassutsimut aamma misissuinermit paasissutissanik, tak. kapitali 2, pisisartumut pissutsit atorunnaarneranniit sivikinnerpaamik ukiuni tallimani toqqortarissavai.

*Imm. 2.* Aningaasanoortartup nuussisarneranut tunngasut allagaatit nalunaarsuinerillu toqqortagaassapput, taamaalilluni nuussinerit naammassineranniit sivikinnerpaamik ukiuni tallimani ataatsimoorlutik nassaareqqinneqarsinnaallutik.

*Imm. 3.* Akuersissummik piginnittup ingerlataqarnera atorunnaarpat kingullertut aqutsisutut sulisimasut kinaassutsimik uppernarsaatit il.il. imm. 1 aamma 2 naapertorlugit suli toqqortarineqarnissaat isumagissavaat.

## Kapitali 4

### *Aningaasanoornermi konto aamma akiliisarnerit*

**§ 6.** Akuersissummik piginnittup aningaasanoortartumut nalunaarsugaasumut aningaasanoornermut kontoqartitsissaq.

*Imm. 2.* Akuersissummi piginnittup aningaasanoornermi kontomi killiffik, aningaasanoornerup oqaluttuassartaa (tassunga ilanngullugit akiliutigisimasat, iluanaarutit annaasallu), akiliutigisimasat tigusimasallu tassungalu atasut nuussinerit allat pillugit paasissutissanut aningaasanoortumut periarfissiilluni. Paasissutissat aningaasanoorfimmi kontomi aningaasanoortartumit sivikinnerpaamik ulluni 90-ini takuneqarsinnaassapput.

*Imm. 3.* Akuersissummik piginnittoq aningaasanoortumiit noqqaasoqarneratigut aningaasanoornermi kontomi nuussinerit tamaasa pillugit kontomi atukkanut takussutissat tamaasa qaammatinut aqqaneq marlunnut kingullernut tunniutissavai.

**§ 7.** Akuersissummik piginnittup § 2-mi taaneqartut paasissutissat misissornissaasa tungaannut taamaallaat aningaasanoortup kontoanut aningaasanoortumut utaqqiisaasumik ammaassisoqarsinnaavoq, taamaattorli tak. imm. 5.

*Imm. 2.* Nalunaarsorneqarnermut atatillugu aningasanoorniartoq paasissutissanik eqqunngitsunik tunniussisimappat, imaluunniit paasissutissat eqqortuuneri pillugit uppernarsaatinik pisariaqartunik akuersissummik piginnittup piumasaqarneratigut ullut 30-t iluanni aningaasanoorniartoq nassiussisimangippat, akuersissummik piginnittup aningaasanoortup kontoa matugallassavaa.

*Imm. 3.* Utaqqiisaasumik aningaasanoornermi kontomiit aningaasanik aningaasanoortumut tunniussisoqarsinnaanngilaq.

*Imm. 4.* Aningaasanoortoq utaqqiisaasumik aningaasanoornermi kontomut annerpaamik 10.000 kr.-inik ikisisinnaavoq.

*Imm. 5.* Inunnut nammineq peqataatinngitsut pillugit nalunaarsuiffimmiittunut utaqqiisaasumik aningaasanoornermi kontomik pilersitsisoqarsinnaanngilaq, tak. § 19.

**§ 8.** Akuersissummik piginnittup aningaasanoornermi kontomut isersinnaanerit, § 2-mi eqqaaneqartut paasissutissat misissorneqarsimallutik, OCES-imi malitassanut imaluunniit qaffasinnerusunik isumannaatsumik digitalikkut atsiorerit atorneqarneri qulakkiissavai.

*Imm. 2.* Akuersissummik piginnittup digitalikkut atsiorneq atorneqartoq aningaasanoortumut § 2 naapertorlugu nalunaarsugaasumit pigineqarnera misissussavaa.

*Imm. 3.* Aningaasanoornermut oqartussat akuerisinnaavaat aningaasanoornermut kontomut isersinnaaneq digitalikkut atsiorneq atornagu piffissami atorneqarsinnaasoq, ima ittoqarpat:

- 1) iserneq Kalaallit Nunaanni pisisartumiit pippat, imaluunniit
- 2) aningaasanoornerup ingerlanneqarfiani teknikkikkut tunngavigineqartumi digitalikkut atsiorneq atorneqarnera teknikkikkut pisinnaangippat. Aningaasanoornermulli kontomut iserneq siulleq digitalikkut atsiorfiusup atorneqarfigisinnaasaani teknikkikkut tunngavigisamiit pissaaq.

*Imm. 4.* Imm. 1 aamma 2 aningaasanoornermi kontomut isernermut, § 2, imm. 4 naapertorlugu aningaasanoortup CPR-normoqarnani pisisartutut nalunaarsorsimanernut atuutinngilaq.

*Imm. 5.* Digitalikkut atsiorneq atornagu aningaasanoornermi kontomut isernermi, tak. imm. 3 aamma 4, aningaasanoortup aarlerinangitsumik kinaassutsimik uppersarsimanera akuersissummik piginnittup qulakkiissavaa.

**§ 9.** Akuersissummik piginnittup akiliinissamut kiffartuussisartumiit, akiliinissamut kiffartuussinerit aamma elektronikkikkut aningaasat pillugit inatsit naapertorlugu nunami maani akuerisaasumik neqerooruteqartunit aningaasanoornermi kontomut akiliinernik taamaallaat tigusaqarsinnaavoq.

*Imm. 2.* Aningaasanngorlugit akiliinerit tiguneqarsinnaangillat.

**§ 10.** Aningaasanoortumiit aningaasat akiliutigineqartut akuersissummik piginnittup akiliinermik tigusineraniit ingerlaannartumik aningaasanoornermi kontomut pisassatut allanneqassapput.

*Imm. 2.* Iluanaarutitut pissarsiarineqartut aningaasanoornermi kontomi pissarsiassatut inissinneqassapput.

**§ 11.** Akuersissummik piginnittup aningaasanoornermi kontot akornanni aningaasanik, aningaasanoornermi meqqinik assigisaanillu nuussinerit akuerissanngilai.

**§ 12.** Aningaasat, aningaasanoortup aningaasanoornermi kontomiititai, tassaapput aningaasat paareqqusaasut, aningaaserivimmi il.il. kontomi ilanngaassiffigineqarsinnaanngitsumi uninngasuutigineqartussat, akuersissummik piginnittup nammineq aningaasaataanit immikkoortinneqartussat, aamma akuersissummik piginnittumit taamaallaat periarfissaqarfigineqartut. Kontomiit aningaasat aningaasanoortumut taamaallaat tunniunneqarsinnaapput taamaattumillu akuersissummik piginnittumiit piumasaqaatinut matussutissatut atorneqarsinnaanatik. Aningaasat akuersissummik piginnittumi akiliisinnaajunnaartoqassagalarpat isumannaarneqarsimassapput.

*Imm. 2.* Aningaasat kontomi ilanngaassiffigineqarsinnaanngitsumi uninngasuutigineqartut qaqugukkulluunniit aningaasanoortup kontoaniittut aningaasanut tamarmiusunut minnerpaamik naapertuutissapput.

## Kapitali 5

### *Aningaasanoortumut paasissutissiineq*

§ 13. Paasissutissat tamarmik, akuersissummik piginnittup pinnguaatit pillugit inatsimmi imaluunniit pinnguaatit aalajangersimasut pillugit Kalaallit Nunaanni inatsimmi aalajangersarneqarsimasut malillugit aningaasanoortumut periarfissiinissamut pisussaaffiusut akuersissummik piginnittup nittartagaani danskisut allaqqasut pissarsiarineqarsinnaassapput. Aningaasanoortup aamma akuersissummik piginnittup akornanni attaveqatigiinnerit tamarmik danskisut ingerlanneqassapput.

*Imm. 2.* Akuersissummik piginnittoq, Kalaallit Nunaanni pinnguaatinik neqerooruetqarnissamut akuersissuteqartoq, imm. 1-imi eqqaaneqartutut paasissutissat danskisut kalaallisullu saqqummiussimassavai.

§ 14. Akuersissummik piginnittup nittartagaani:

- 1) Takuneqarsinnaassaaq inuit 18-it inorlugit ukiullit pinnguaatini peqataanissaat akuerisaanngitsoq.
- 2) Akisussaassuseqartumik pinnguarnaq aamma pinnguarnarup ajoqusiisinaanera pillugu paasissutissiisoqassaaq. Paasissutissat katsorsaavik suleqatigalugu suliarineqarsimassapput.
- 3) pinnguaatinik pinngitsuugarsinnaannginneq pillugu imminut misilinissamut periarfissiisoqarluni.
- 4) Danmarkimi katsorsaaviit pillugit paasissutissat attaviginissaaannullu najukkat paasissutissiissutigineqarlutik.

*Imm. 2.* Imm. 1-imi paasissutissat akuersissummik pigittup nittartagaani saqqumisumi inissinneqarsimassapput aamma nittartakkami quppernemit tamanit iserfigineqarsinnaassallutik.

*Imm. 3.* Akuersissummik piginnittoq, Kalaallit Nunaanni pinnguaatinik neqerooruteqarnissamut akuersissuteqartoq, imm. 1-imi eqqaaneqartutut paasissutissat danskisut kalaallisullu paasissutissiissutigissavai aamma kalaallit nunaanni katsorsaaviit attaviginissaannut najugaq pillugu paasissutissiissalluni.

§ 15. Akuersissummik piginnittup nittartagaata saqqaani takuneqarsinnaassaaq akuersissummik piginnittoq Spillemyndighedimiit akuersissummik pigisaqarlunilu nakkutigineqartuusoq. Spillemyndighedip nittartagaanut isersinnaanermut paasissutissiisoqassaaq.

§ 16. Akuersissummik piginnittup nittartagaani aamma nalunaaqutaqassaaq quppernermi pinnguarfiusumi piffissamik atuneq pillugu pinnguanoortumut paasisaqarnissamut periarfissiisumik. Nalunaaqutaq piffissaq tamaat pinnguanoortumit takuneqarsinnaassaaq.

## Kapitali 6

### *Akisussaassuseqartumik aningaasanoorneq*

§ 17. Akuersissummik piginnittoq ullormi, sapaatip akunneranut qaammammut akiliutinik killiliisinnaasunik aningaasanoortumut atortumik periarfissiissaaq. Akiliutissanut

killiliussanik aalajangersaanissaq pillugu aningaasanoortup noqqaanera noqqaanerup kinguninngua malineqassaaq, taamaattorli tak. imm. 2.

*Imm. 2.* Siusinnerusukkut akiliuteqarnissamut killiliussamik aalajangersaasimanerup qaffanneqarnissaa pillugu noqqaaneq siusinnerpaamik nalunaaquttap akunneri 24-t kingorna atuutilersinnaavoq.

**§ 18.** Utaqqiisaasumik imaluunniit inaarutaasumik pinnguaatinut ilaajunnaarnissaq pillugu aningaasanoortartup noqqaassuteqarnissaanut periarfissiisumik atortumik akuersissummik piginnittoq aningaasanoortartumut periarfissiissaaq. Ilaajunnaarnissaq pillugu aningaasanoortartup noqqaassuteqareernerata kingorna, aningaasanoortartup pinnguaatinut nutaanut ilaasinnaannginnera akuersissummik piginnittup qulakkiissavaa.

*Imm. 2.* Utaqqiisaasumik ilaajunnaarneq ullut 30-t inorlugit sivikissuseqarsinnaanngilaq, taamaattorli aningaasanoortartoq nalunaaquttap akunnerini 24-ni (nillorsarnissamut piffissaq) sivikitsumik pinnguanoornermut toqqaanissamut periarfissaqassaaq. Utaqqiisaasumik ilaajunnaarneq aamma sivikitsumik pinnguanoornermit unillatsiarneq isumaqarpoq piffissami tassani aningaasanoortup pinnguanoornermi kontoa atorneqarsinnaassanngitsoq.

*Imm. 3.* Inaarutaasumik aningaasanoortup ilaajunnaarnerata kingunerisaanik akuersissummik piginnittup aningaasanoortup pinnguanoornermut kontoa matussavaa pisisartumullu pissutsit naammassillugit. Aningaasanoortartoq aningaasanoornermut kontop matuneqarneraniit siusinnerpaamik ukioq ataaseq aatsaat qanngiuppat pisisartutut kingumut nalunaarsorneqarsinnaavoq, tak. § 2.

*Imm. 4.* Akuersissummik piginnittup pinnguaataani peqataanissamut aningaasanoortartoq nammineerluni ilaajunnaarnini isumagisimappagu akuersissummik piginnittup danmarkimi katsorsaavimmi pinnguaatinik pinngitsuugarsinnaannginneq pillugu siunnersortinneqarnissamut katsorsartinneqarnissamullu neqeroorut pillugu aningaasanoortartoq ilisimatissavaa. Aningaasanoortartoq Kalaallit Nunaanneersuuppat ilaajunnaarnini isumagisimappagu akuersissummik piginnittup danmarkimi katsorsaavimmi pinnguaatinik pinngitsuugarsinnaannginneq pillugu siunnersortinneqarnissamut katsorsartinneqarnissamullu Kalaallit Nunaanni katsorsaavimmi neqeroorut pillugu ilisimatitsissaaq.

**§ 19.** Aningaasanoortartut, utaqqiisaasumik imaluunniit inaarutaasumik akuersissummik piginnittunit tamani pinnguaatinut ilaajunnaarnissamik kissaateqartut pillugu Spillemyndighedi nalunaarsuissaaq. Aningaasanoortartoq Spillemyndighedip nittartagaani nalunaarsuiffiani nalunaarsorneqarsinnaavoq imaluunniit Spillemyndighedimut saaffiginnissinnaalluni.

*Imm. 2.* Nalunaarsuiffimmi allatsinneqarnissamut periarfissaq pillugu akuersissummik piginnittoq paasissutissiissaaq aamma Spillemyndighedip nittartagaani nalunaarsugaanissamut periarfissaqarneq pillugu ilisimatitsissalluni.

*Imm. 3.* Aningaasanoortartumik nutaamik pilersitsinermi akuersissummik piginnittup aningaasanoortartoq pineqartoq nalunaarsuiffimmi allatsissimannginnersoq misissorniarlugu inuit nammineq ilaajunnaartissimasut pillugit nalunaarsuiffimmut saaffiginnissaaq. Aningaasanoortartoq nalunaarsuiffimmi allattugaappat aningaasanoortartumik pilersitsinissaq akuersissummik piginnittumit itigartitsissutigineqassaaq.

*Imm. 4.* Akuersissummik piginnittoq aningaasanoortarfimmu aningaasanoortup isernerani nalunaarsuiffimmi allatsissimanningsorq misissorniarlugu inuit nammineq ilaajunnaartissimasut pillugit nalunaarsuiffimmu saaffiginnissaaq. Aningaasanoortartoq nalunaarsuffimmi allattugaappat aningaasanoortartoq pinnguaatinut isersinnaanera itigartinneqassaaq.

*Imm. 5.* Aningaasanoortartoq inuit nammineq ilaajunnaartissimasut pillugit nalunaarsuiffimmi inaarutaasumik ilaajunnaarsimasutut nalunaarsuiffimmi allatsissimasorq akuersissummik piginnittoq ilisimasaqalerpat akuersissummik piginnittup aningaasanoortartup aningaasanoornermi kontoa matussavaa pisisartutullu pissutsit atorunnaarsillugit.

*Imm. 6.* Aningaasanoortartoq inuit nammineq ilaajunnaartissimasut pillugit nalunaarsuiffimmi inaarutaasumik ilaajunnaarsimasutut nalunaarsuiffimmi allatsissimasorq qaqugukkulluunniit, taamaattorli nalunaarsuiffimmi ilanngunnermiit siusinnerpaamik ukiut ataatsip kingorna nalunaarsuiffimmiit peerneqarnissaaq pillugu Spillemyndighedimut noqqaassuteqassaaq.

*Imm. 7.* Imm. 1-6 pisisartunut CPR-normoqarnatik § 2, imm. 4 naapertorlugu nalunaarsorsimasunut aningaasanoortartunut nalunaarsorneqarsimasunut atorneqassanngillat.

**§ 20.** Akuersissummik piginnittoq utaqqiisaasumik imaluunniit inaarutaasumik pinnguaatini peqataanissamut nammineq ilaajunnaartissimasunut aningaasanoortartunut nittarsaassutininik nassiussinnginnissaaq pillugu aaqqiissuteqassaaq.

## Kapitali 7

### *Bonus*

**§ 21.** Akuersissummik piginnittup pinnguaatini peqataanissamut aningaasanoortartumut bonusinik neqerooruteqarpat piunasaqaatit tamarmik erseqqissumik paatsuugassaannigsumillu neqeroorummut atatillugit paasissutissiissutigineqassapput. Aningaasanoortumut bonusinik tunniussineq piunasaqaatit naammassineqarsimappata ingerlaannaq tunniunneqassapput.

*Imm. 2.* Bonusit piunasaqaatit aningaasanoortunut allanut neqeroorutiniit allaanerusut aningaasanoortunut ataasiakkaanut tunniunneqassanngillat.

*Imm. 3.* Bonusit tunniunneqarnissaanut atasut piunasaqaatit naammassineqarnissaannut aningaasanoortoq sivikinnerpaamik ullunik 60-inik periarfissinneqassaaq.

## Kapitali 8

### *Atorunnaarsitsineq aamma aningaasanoornermi kontomik matusineq*

**§ 22.** Aningaasanoornermi kontomik matusinermi akuersissummik piginnittoq piaarnerpaamik kingusinnerpaamillu matusinerup kingorna ullut suliffiusut tallimat kingorna aningaasanoortartup aningaasanoornermi kontoani nikingassutaasut aningaasanoortumut akilissavai. Matusinermut akiliummik akileeqqusisoqassanngilaq.

*Imm. 2. § 7, imm. 2 tunuliaqutaralugu utaqqiisaasumik aningaasanoornermi kontomik matusinermi aningaasanoornermi kontomi aningaasat ikkunneqarsimasut sinneri kisimik aningaasanoortumut utertinneqarsinnaapput. Iluanaarutaasinnaasut akuersissummik piginnittumut tutsinneqassapput.*

*Imm. 3. Akuersissummik piginnittup iliuseqarneratigut aningaasanoornermi kontomik matusinermi akuersissummik piginnittoq aalajangiinermik tunngavilersorneqarsimasumik uppersaatitalimmik aningaasanoortumut nassiussissaaq. Aalajangiinerup assilinera Spillemyndighedimut nassiunneqassaaq.*

**§ 23.** Aningaasanoornermi kontomik atorunnaarsitsinermi akuersissummik piginnittoq piffissap naammaginatup iluani akuersissummik piginnittoq aalajangiissaaq. Piffissami atorunnaarsitsiffiusumi aningaasanoortartup aningaasanoornermi kontoni matusinnaangilaa. Inaarutaasumik aalajangiisoqarpat aalajangiineq pillugu iluameersumik aningaasanoortartuq ilisimatinneqassaaq.

*Imm. 2. Akuersissummik piginnittoq aalajangiineq tunngavilersorneqartoq aningaasanoortartumut nassiutissavaa. Aalajangiinerup assilinera Spillemyndighedimut nassiunneqassaaq.*

## Kapitali 9

### *Pinnguaatit aaqqissugaaneri*

**§ 24.** Akuersissummik piginnittup nakkutilliinermik aaqqissuussinernut aamma pinnguaatit aaqqissugaaneritut teknikkikkut piumasaqaatit, ilanngussaq 1-imiittut eqqortissavai.

**§ 25.** Pinnguaatit aaqqissugaaneri, tassani paasineqarluni qarasaasiaqarnikkut atortut, qarasaasiakkut kasinortitsineq pillugu neqeroorummi atorneqartut, tak. ilanngussaq 1, nunami maani inissisimassapput.

*Imm. 2. Imm. 1-imi piumasaqaatip saneqqunneqarsinnaanera Spillemyndighedip akuerisinnaavaa, akuersissummik piginnittoq:*

- 1) nunami allami pinnguaatinik neqerooruteqarsinnaanermut akuersissuteqarpat, tassani pisortani oqartussat akuersissummik piginnittup pinnguaatini neqeroorutaanut nakkutilliisuullutik, nakkutilliinermilu oqartussat taakku akuersissummik piginnittup pinnguaatinik nunami maani neqeroorutaanik nakkutilliinissaq pillugu Spillemyndighedimik isumaqatigiissuteqarsimappat, imaluunniit
- 2) ungasianiit isersinnaaneq assigisaaluunniit iluaqutigalugu pinnguaatit aaqqissugaanerinik aarlerinangitsumik nakkutilliinissamut Spillemyndighedimut periarfissiisimappat.

**§ 26.** Akuersissummik piginnittup pinnguaatinik aaqqissuussineri, suleriaasia niuernikkullu ingerlatsinera suliffeqarfimmik misissuisussatut piginnaatitaasumit akuerisaallutik allagartalerneqassapput, pinnguaatinik aaqqissuussineq qarasaasiakkut kasinortitsinermik ingerlatsinissamut atorneqalernissaa sioqqullugu. Allagartaliinermut piumasaqaatinik Spillemyndighedi aalajangersaasinnaavoq.



*Imm. 2.* Spillemyndighedi suliffeqarfik misissuisussatut qanoq piginnaatitaassanissaanut piumasqaatinik aalajangersaassaaq.

§ 27. Pinnguaatinut aaqqissuussineq akuerisaalluni allagartalerneqarpat Spillemyndighedi qaqugukkulluunniit aaqqissuussinernik annertunerusumik misileraasinnaanissamut, uppersaanissamut allagartaliinissamullu akuersissummik piginnittumut peqqusisinnaavoq.

§ 28. Akuersissummik piginnittoq pinnguaatinik aaqqissuussinermi qararasaasiakkut kasinortitsinermik neqeroorut pillugu nalunaarsukkanik tamanik sivikinnerpaamik ukiuni tallimani toqqortaqaassaaq.

## Kapitali 10

### *Alaatsinaannissamut, misissuinissamut nalunaaruteqarnissamullu pisussaaffiit*

§ 29. Akuersissummik piginnittup aqutsisui sulisuilu, pinnguaatinik ilaanik suliaqartut, aningaasanoortut ingerlataqarnerat, pissusumikkut pinerlunnikkut aningaasarsiat aningaaserivimmut inissinneqarsimasunut imaluunniit qunuseriarinninnikkut aningaasalersuinermit atassuteqarsinnaasunut alaatsinaassapput. Tamanna pingaartumik paasiuminaattunut imaluunniit immikkut annertuunik nuussinernut aamma aningaasanoortartumut naleqqiullugu ileqqusuunngitsumik nuussinernut atuuppoq kiisalu nuussinerit Financial Action Task Forcemiit nalunaarutit naapertorlugit nunanut pinerlunnikkut aningaasarsiat aningaaserivimmut inissinneqarsimasunut imaluunniit qunuseriarinninnikkut aningaasalersuinermit immikkut atassuteqarsinnaasunut isigineqartunut.

*Imm. 2.* Imm. 1-imi taaneqartunik ingerlatani nuussinernilu siunertat misissorneqassapput, tamatumalu inernera nalunaarsorneqassalluni toqqortarineqarlunilu, tak. § 5.

§ 30. Pinerlunnikkut aningaasarsiat aningaaserivimmut inissinneqarsimasunut imaluunniit qunuseriarinninnikkut aningaasalersuinermit atassuteqartunut imaluunniit atassuteqarsinnaasunut aningaasanoortup nuussisimanagera pillugu pasinnittoqarpat akuersissummik piginnittup nuussineq imaluunniit saaffiginnissut erseqqinnerusumik misissussavaa. Pasinninneq uppersaneqarsinnaangippat Statsadvokaten for Særlig Økonomisk Kriminalitet ingerlaannartumik nalunaarfigineqassaaq.

*Imm. 2.* Pinerlunnikkut aningaasarsiat aningaaserivimmut inissinneqarsimasunut imaluunniit qunuseriarinninnikkut aningaasalersuinermit atassuteqarnermut tunngasoq pasinninneq naammassineqareersimangippat unitsikkallartinneqassaaq, imm. 1 malillugu nalunaaruteqarnissaaata tungaanut. Nuussinerup naammassineqarnissaa pinngitsoorneqarsinnaangippat, imaluunniit nalilerneqarpat tamanna paasiniaanermit ajoqusiinnaasoq, nalunaaruteqarneq naammassisaqarnerup kinguinngua tunniunneqassaaq.

§ 31. Spillemyndighedi pinerlunnikkut aningaasarsiat aningaaserivimmut inissinneqarsimasunut imaluunniit qunuseriarinninnikkut aningaasalersuinermit atassuteqartunut pissutsinut ilisimasaqarpat Spillemyndighedi Statsadvokaten for Særlig Økonomisk Kriminalitetimut nalunaaruteqassaaq.

## Kapitali 11

### *Nipangiussisussaassuseq aamma akisussaaneq*

§ 32. § 30 malillugu ajunngitsumik isumaqarluni akuersissummik piginnittup tunniussai nalunaarutit paasissutissallu akuersissummik piginnittumut, taassuma sulisuinut imaluunniit aqutsisuinut arlaannaatigulluunniit akisussaatisumik tutsinneqassanngillat. Tamatumunnga atasumik paasissutissanik ingerlatitseqqinneq nipangiussisussaassusermik unioqqutitsinertut isigineqassanngilaq.

§ 33. Akuersissummik piginnittoq, aqutsisui tassanilu sulisut kiisalu kukkunersiuisut allallu taamatut immikkut suliaqarsimasut imaluunniit immikkut suliaqarsimasut § 30 malillugu nalunaaruteqarsimanerup, imaluunniit tamatuminnga eqqarsaateqarsimaneq, imaluunniit pinerlunnikkut aningaasarsiat aningaaserivimmu inissinneqarsimasunut imaluunniit qunuseriarinninnikkut aningaasalersuineq pillugu misissuineramik aallartitsisoqarsimaneranik imaluunniit aallartitsisoqarnissaanut isertuunnissaannut pisussaaffeqarput, taamaattorli tak. imm. 2.

*Imm. 2.* § 30 malillugu nalunaaruteqarsimanerup, imaluunniit tamatuminnga eqqarsaateqarsimaneq, imaluunniit pinerlunnikkut aningaasarsiat aningaaserivimmu inissinneqarsimasunut imaluunniit qunuseriarinninnikkut aningaasalersuineq pillugu misissuineramik aallartitsisoqarsimaneranik imaluunniit aallartitsisoqarnissaa pillugu paasissutissat Spillemyndighedimut ingerlateqqinneqarsinnaapput una siunertaralugu akuersissummik piginnittumik nakkutilliinermut atugassanik paasissutissanik Spillemyndighedi suliaqarsinnaanera.

## Kapitali 12

### *Suliffiup iluani maleruagassat aamma ilinniartitaaneq il.il.*

§ 34. Akuersissummik piginnittoq aarlerinangitsumik nakkutilliinermik attaveqaateqartarnermillu suleriaaseqarneq pillugu allatanik suliffiup iluani maleruagassaliussaaq, tassunga ilanngullugit pisisartup kinaassutsiminik uppernarsaanera, alaatsinaannissamut, misissuinissamut nalunaarsuinissamullu pisussaaffik, nalunaaruteqarneq, nalunaarsukkanik toqqortaqarneq, aarlerinartunik nalilersuineq, attaveqaateqarneq aamma pinerlunnikkut aningaasarsiat aningaaserivimmu inissinneqarsimasut imaluunniit qunuseriarinninnikkut aningaasalersuinerup pitsaaliornissaa akornusernissaalu siunertaralugu nakkutillineq.

*Imm. 2.* Akuersissummik piginnittoq aamma sulisunut ilinniartitaanermik ilitsersuussinikkullu suliniutinik piareersaassaaq, taamaalilluni kapitali 2, 3, 10 aamma 11-mi maleruagassat eqqortinneqarlutik.

*Imm. 3.* Akuersissummik piginnittup sulisut nalunaarsuineramik, aningaaanik taarsiinermik pinnguaatinillu ingerlataqarnremik suliaqartut suliffiup iluani maleruagassanik kiisalu nalunaarummit matuminnga kiisalu pinnguaatit pillugit inatsimmi aamma pinnguaatit aalajangersimasut pillugit Kalaallit Nunaanni inatsimmi takuneqarsinnaasunik pisussaaffinnik ilisimasaqalerlutik.

*Imm. 4.* Akuersissummik piginnittoq qaammatit pingasukkaarlugit Statsadvokaten for Særlig Økonomisk Kriminalitetimut nalunaarutit amerlassusii aamma imm. 2 malillugu ilinniartitaanermik aamma ilitersuussilluni suliniutinik ingerlataqarsimasut sulisut amerlassusaat pillugu Spillemyndighedimut paasissutissanik nassiussisassaaq.

## Kapitali 13

### *Naammagittaalliuutit*

**§ 35.** Akuersissummik piginnittup pinnguaatinik akuersissummik piginnittup neqeroorutaanut tunngasunik aningaasanoortartuniit naammagittaalliuutit suliarissavai. Naammagittaalliuut aningaasanoortartup kinaassusianik kiisalu pissutsit naammagittaalliuutigineqartut pillugit tunngavilersuutit pillugit paasissutissanik imaqqassaaq. Piumasaqaatit naammassineqarsimangippata naammagittaalliuut itigartinneqarsinnaavoq.

*Imm. 2.* Akuersissummik piginnittup sapinngisamik piaarnerpaamik naammagittaalliuut suliarissavaa. Ullut 14-it iluanni naammagittaalliuut suliarineqarsimangippat suliami qaqugu aalajangiisoqarsinnaanera pillugu akuersissummik piginnittoq aningaasanoortartumut ilisimatitsissaaq.

*Imm. 3.* Akuersissummik piginnittup suliani naammagittaalliuutinut ilaasut allagaatit sivikinnerpaamik ukiuni marlunni toqqortarissuui, tassunga ilanngullugit aamma naammagittaalliuutini itigartinneqarsimasuni allagaatit. Piumasaqartoqarneratigut taakku Spillemyndighedimut nassiunneqassapput.

## Kapitali 14

### *Nakkutilliineq*

**§ 36.** Nalunaarutit matuma eqqortinneqarneranik Spillemyndighedi nakkutilliissaaq, tak. pinnguaatit pillugit inatsimmi kapitali 9 aamma pinnguaatit aalajangersimasut pillugit Kalaallit Nunaanni inatsimmi kapitali 6.

## Kapitali 15

### *Pineqaatissiineq*

**§ 37.** Inatsit alla malillugu pissuteqartumik qaffasinnerusumik pineqaatissiisoqanngippat § 2, imm. 1, oqaaseqatigiinnik siullernik, aamma imm. 2-8, §§ 3-7, § 8, imm. 1 aamma 2, imm. 3, oqaaseqatigiit aappaat, aamma imm. 5, §§ 9-18, § 19, imm. 2-5, § 21, § 22, imm. 1 aamma 3, § 23, imm. 2, § 24, § 25, imm. 1, § 26, imm. 1, oqaaseqatigiinnik siullernik, § 27, § 28, § 29, imm. 2, § 30, imm. 1 aamma imm. 2, oqaaseqatigiit siulliit, § 33, imm. 1, § 34 aamma § 35, imm. 1, oqaaseqatigiinnik siullernik, aamma imm. 3-mik piaaraluni imaluunnit ingasattumik mianersuaattumik unioqqutitsinerit akiliinermik pineqaatissiissutaasinnaapput.

*Imm. 2. Pillaasarnermik inatsimmi kapitali 5-imi maleruagassat malillugit ingerlatseqatigiiffiit il.il. (inatsisitigut pisinnaatitaasut pisussaaffeqartullu) pineqaatissinneqarnermi akisussaatinneqarsinnaapput.*

## Kapitali 16

### *Atuutilernera*

§ 38. Nalunaarut ulloq 1. februar 2012-imi atulersinneqarpoq.

*Akilerartarnermut ministeriaqarfik, ulloq 25. januar 2012.*

THOR MÔGER PEDERSEN

/Tina Olsen

### Akuersissummik piginnittunut teknikkikkut piomasaaqatit

#### A. Aallarniut

Allakkiami matumani akuersissummik piginnittup naammassisassai teknikkikkut piomasaaqatit allaaserineqarput, tassunga ilanngullugit nakkutilliineq pillugu nalunaarsukkanut tunngavigineqartut qulakkeerneqarneri kiisalu iserfigineqarsinnaaneq, suliffiup iluani nakkutilliineq, suleriaatsit aqqissugaanerlu pillugit piomasaaqatit.

#### B. Naalisaanerit nassuiaatillu

SAFE: Nalunaarsukkanut toqqorsivik akuersissummik piginnittup aningaasanoornermi nalunaarsukkanik toqqorsivissatut pilersitassaa, nakkutilliineri atugassatut Spillemyndighedimit piomasaaqatigineqartoq.

RNG: Random Number Generator (nalaatsortuunerlut generatori)

Aningaasanoornermi aqqissuussineq: Qarasaasiakkut kasinortitsineri neqeroorutinut ingerlatsinermullu akuersissummik piginnittumit imaluunniit taanna sinnerlugu atorineqartut elektrinikkut imaluunniit allat atortut, tassunga ilanngullugit atortut:

1. aningaasanoornermi inuup peqataaneranut tunngasunik paasissutissanik toqqorsineri atortut, tassunga ilanngullugit oqaluttuarisaanerimmi nalunaarsukkat aamma inernerit pillugit paasissutissat,
2. aningaasanoortumut pinnguaatinik saqqummersitsisut aamma/imaluunniit ilisaritsisut, imaluunniit
3. aningaasanoornerup inerneranik aalajangersaasoq, imaluunniit aningaasanoortup pinnguaammik eqquineranik imaluunniit annasaqarneranik naatsorsuisoq.

SAFE aningaasanoornermi aqqissuussinerlut immikkoortutut ilaangilaq.

FTPS: File Transfer Protocol SSL.

SSL: Secure Sockets Layer.

XSD: XML Standard Definition.

XML: Extensible Markup Language.

#### C. Pinnguaatinik nakkutilliineri atugassaq aqqissuussinerit ataatsimoortut tamarmiusut

Aqqissuussinerit ataatsimoortut tamarmiusut tassaapput akuersissummik piginnittup pinnguaatinik aqqissuussinera, akuersissummik piginnittup nalunaarsukkanik toqqorsivia

(SAFE), isumannaallisaanermik aaqqissuussineq (Tamper Token) aamma aningaasanoortartut namminerisaminnik ilajunnaartut pillugit nalunaarsukkat (ROFUS).

1. **SAFE** tassaavoq akuersissummik piginnittup nammineq nalunaarsukkanik toqqorsivia, - Standard Records malillugu – pinnguaatinut tamanut akuersissummik piginnittumi ingerlanneqartunut aningaasanoornermi nalunaarsukkanik akuersissummik piginnittup toqqorsivissaa. Akuersissummik piginnittut tamarmik nalunaarsukkanik toqqorsivimmik (SAFE) pilersitsissapput. Spillemyndighedi akuersissummik piginnittumi nalunaarsukkanik toqqorsivimmut internettikut toqqaannartumik isersinnaassaaq.

2. **Tamper Token.** Tamper Tokenimut atorneqartussamik isumannaallisaanermi aaqqissuussinermik Spillemyndighedi atulersitsissaaq. Tamper Tokenip siunertaraa aningaasanoornermi nalunaarsukkat, akuersissummik piginnittup SAFE-mi Standard Recordsit toqqorsimasai, taakku SAFE-miinnerini allanngortinnginnissaanik qulakkeerinissamik siunertaqarpoq. Aalajangersimasumik naliliisoqarneratigut akulikissusissaa iluarsineqarsinnaavoq. Aningaasanoornermi nalunaarsukkat toqqorneqarsimasut tokenit atorneqartut aallaavigalugit kinaassutsimik ilisarnaammik pilersitsinissamat Spillemyndighedip piumasaqaataanik malinnittumik akuersissummik piginnittoq atulersitsissaaq. Kinaassutsimut ilisarnaat tokenip pineqartup naanissaa sioqqullugu Spillemyndighedimut nalunaarutigineqassaaq. Akuersissummik piginnittup Tamper Tokenimik attaveqarnera webservices aqutigalugu ingerlanneqassaaq. Spillemyndighedimi Tamper Tokenip uku passutissavai:

- Kinaassutsimut ilasarnaatip naatsorsornerani atugassamik matuersaatinik (token) pilersitsineq.
- Kinaassutsimut ilisarnaatinik kingusinnerusukkut misissorneqartussanik toqqorsineq.
- Tokenip eqqortinneqarnerata naammassineqarneranut piffissaliussap ingerlaavartumik nakkutiginera.
- Aningaasanoornermi nalunaarsukkanik aallertarnernik uppernarsaanerit kinaassutsimut ilisarnaammut tiguneqartumut naleqqiullugu allanngortinneqarsimannginnera.

Tokenimik nutaamik atulersitsinermut atatillugu tokenip allanngortinneqartup akulikissusianik akuersissummik piginnittup passussisinaanera piumasaqaataavoq.

3. **Aningaasanoortartut nammineq ilajunnaartittut pillugit nalunaarsuiffik (ROFUS)** tassaavoq Danmarkimi qarasaasiakkut aningaasanoornissamiit – utaqqiisaasumik imaluunniit inaarutaasumik – ilajunnaarnissamik namminerisaminnik kissaateqartut Danmarkimi aningaasanoortartut tamaasa pillugit nalunaarsuiffik. Nalunaarsuiffik Spillemyndighedimi inissisimavoq, taanna nalunaarsuiffimmik ingerlatsinissamat akisussaalluni. Akuersissummik piginnittup nalunaarsuiffimmut atassuserneqassaaq aamma aningaasanoortartut nalunaarsortissimasut akuersissummik piginnittup pinnguaatinik aaqqissuussaanik aningaasanoorsinnaannginnerat qulakkiissallugu. ROFUS-imik aaqqissuussamik akuersissummik piginnittup attaveqarsinnaanera webservices aqutigalugu pissaaq.

Akuersissummik piginnittoq Tamper Tokenimi aamma ROFUS-imi kukkunerit pillugit sapinngisamik piaarnerpaamik Spillemyndighedimut ilisimatitsissaaq.

**D. Aningaasanoornermi nalunaarsukkanut piumasaqaatit (Standard Records)**

Akuersissummik piginnittup aningaasanoornermi nalunaarsukkat SAFE XML- filini toqqussavai Spillemyndighedip tamanut saqqummiussinera malillugu akulikitsigisumik. Imatut immikkoortitsisoqarpoq:

- EndOfDay
- PokerTurnering
- PokerCachGame
- Kasinospil
- Jackpot

Pinnguaatinut assigiinngitsunut qulaani immikkoortitsinerit avataaniittunut aningaasanoornermi nalunaarsukkat qanoq SAFE-mi toqqorneqarnissaat pillugu Spillemyndighedi isumaqatigiissuteqarfigineqassaaq. Tamanna pinnguaatinik neqerooruteqarnissaq sioqqullugu naammassineqassaaq.

Aningaasanoornermi nalunaarsukkat qanoq iluseqartillugit SAFE-mut nassiunneqarnissaannik teknikkikkut allaaserinninneq (Standard Records) Spillemyndighedi tamanut saqqummiussissaaq. Teknikkikkut allaaserinninnermiippat taaguutit aamma immikkoortut nassuiaatai. Allaaserinninnermut ilaapput XSD-filit, ilusai aningaasanoornermi nalunaarsukkat SAFE-mi toqqorneqarnerini eqqortinneqassallutik.

## **E. SAFE-mut piumasaqaatit**

### **E. 1 Akuersissummik piginnittup nalunaarsukkanik toqqorsivia**

Akuersissummik piginnittoq aningaasanoornermi nalunaarsukkanik toqqorsinissamat nalunaarsukkanik toqqorsivimmik (SAFE) pilersitsissaaq.

Akuersissummik piginnittup Standard Records malillugu aningaasanoornermi nalunaarsukkat nalunaarsukkanik toqqorsivimmut nuullugit toqqorsimassavai. Akuersissummik piginnittoq aningaasanoornermi nalunaarsukkat SAFE-mi qaammatinut kingullernut 12-inut toqqorsimassavai kiisalu aningaasanoornermi nalunaarsukkat digitalikkut atuarneqarsinnaasumi toqqorsivimmi sulii qaammatini 48-ni toqqorsimassallugit.

Akuersissummik piginnittup aamma Spillemyndighedip nakkutilliiviata akornanni nalunaarsukkanik nuussineq internettikkut FTPS atorlugu ingerlanneqassaaq minnerpaamik 8 Mbit/s-imik sukkassuseqartumi. Akuersissummik piginnittup aningaasanoornermi nalunaarsukkanik ajornartorsiutitaqanngitsumik tulluurtumik nuussinissamat atassummik qulakkeerissaaq.

#### **E. 1.1 SAFE-mut teknikkikkut piumasaqaatit**

- SAFE serverimi immikkoortumi pilersinneqassaaq, akuersissummik piginnittup pinnguaatinut aqqissuussaani immikkoortinneqartoq.
- SAFE-imi aningaasanoornermi nalunaarsukkat nalunaarsukkanit allanit naleqquttumik illersorneqarsinnaasumillu avissaartinneqarsimassapput.
- Aningaasanoornermi nalunaarsukkat tamarmik pisariaqartumik isumannaallisaanermi immiussimanissaat akuersissummik piginnittup isumagissuaa. SAFE aamma SAFE-p isumannaallisaanermi immiunneqarnera inissisimaffimmini avissaarsimassapput. Aammattaaq digitalikkut atuarneqarsinnaasumi toqqorsivimmi nalunaarsukkanik toqqorsineq taakkuninnga isumannaallisaanermi immiussanit inissisimaffimmikkut avissaarsimassallutik.

- SAFEp, nalunaarsukkanik toqqorsivittut atorneqalertinnani, qarasaasiakkut kasinortitsineq pillugu nalunaarut malillugu akuersissummik piginnittup pinnguaatinik aqqissuussaatur minnerpaamik taamaaqataanik qaffasitsigisumik qarasaasiatigut isumannaallisaanermi piumasaqaatit naammassisimassavai.
- Spillemyndighedip SAFE-miit aningaasanoornermi nalunaarsukkanik qarasaasiakkut aallersinnaanera akuersissummik piginnittup qulakkiissavaa.
- Isumannaatsumik iserfissakkut (FTPS) SAFE-mut isernissamut akuersissummik piginnittoq pilersitsissaaq.
- SAFE-mi mappit aqqissugaaneri Spillemyndighedip immikkoortitigaatut aqqissuussineq malillugu aqqissuunneqassapput, tak. immikkoortoq E. 3 “SAFE-mi mappit aqqissugaanerat aamma Standard Recordsip atilenera”.
- SAFE-mi aningaasanoornermi nalunaarsukkat Standard Recordsimi immikkoortiterinerit malillugit toqqorsimaneqassapput, tak. immikkoortoq D “Aningaasanoornermi nalunaarsukkanut piumasaqaatit (Standard Records)”.
- Akuersissummik piginnittup SAFE-p piumasaqaatinik allanneqartunik eqqortitsinera uppersassavaa.
- SAFE pillugu ingerlatsinermut uppersaammik akuersissummik piginnittoq suliaqassaaq, tassunga ilanngullugit ingerlatsiffiusut pisariaqartut pillugit uppersaatit, ingerlatsinermi suleriaatsit, sillimaniarnermik aqqissuussineq aamma kukkunermik passussineq.
- Uppersaanerit tamarmik danskisuunngorlugit tunniunneqassapput. Taamaattorli nalinginnaasumik pissutsinik teknikkikkut immikkoortiterinerit tuluttuunngorlugit tunniunneqarsinnaapput.
- Uppersaanerit apeqquteqartoqarneratigu Spillemyndighedimut kinguarsarneqanngitsumik aamma ullunik suliffiusunik marlunnik sivirusunngitsumik elektronikkut pissarsiarineqarsinnaasunngortinneqassapput (assersuutigalugu mailikkut, USB-stik, CD-rom, DVD).
- Uppersaanerit tamarmik Spillemyndighedimit passunneqarsinnaasunngorlugit iluseqartillugit tunniunneqassapput, aamma Microsoft Office-mi imaluunni Adobe Readerimi atuarneqarsinnaassallutik.
- Uppersaaneq ingerlaavartumik nutarterneqartassaaq minnerpaamillu saqqummersitsinerni tamani. Saqqummersitsinerni tamani saqqummersitsinermut tunngavigneqartunik allaasserinnittoq uppersaat nutartigaasoq ilaatinneqartassaaq.
- SAFEp qaammatikkaartumik pissarsiarineqarsinnaanera:

|  |   |
|--|---|
| Pissarsiarineqarsinnaanera                 | 98,50 pct.  |
| Ajutoortoqarnera piffissaq qisuariarfiusoq | Nalunaaquttap akunnerata ataatsip iluani, ataasinngorneq – tallimanngorneq, piffissami 08.00 – 17.00 (danskitaq nalunaaqutaat malillugu). |

|                             |  |
|-----------------------------|--|
| Piffissaq akissuteqarfissaq | Isernermut agguaqatigiissillugu piffissaq akissuteqarfiususaaq 10 sekundit sivikinnerusaaq |
|-----------------------------|--|

- SAFE-mi kiffartuussinermi igalaat:

| Igalaap suunera | Kiffartuussinermi igalaaq | sivissusaa | Kalerrineq – kiffartuussinermi |
|-----------------|---------------------------|------------|--------------------------------|
|-----------------|---------------------------|------------|--------------------------------|



|  |   |                                 | <b>igalaamik<br/>iluaquteqarneq</b>              |
|--|---|---------------------------------|--|
| Standard changes,<br>patchning, il.il.                                   | Ulloq unnuarluni<br>ataasiarluni<br>piffissami<br>ataasinngorneq –<br>tallimannngorneq nal.<br>17.00 – 06.00<br>aamma<br>arfininngorneq<br>sapaallu nal. 00.00 –<br>23.59 | 120 min                         | Ulluni suliffiusuni<br>tallimanik<br>kalerriineq |
| Nutarterinerit<br>annertunerusut   | Qaammammut 0-4<br>piffissami<br>arfininngorneq 00:00<br>– ataasinngorneq<br>05:00   | 20 tiimit                       | Ulluni suliffiusuni<br>qulinik kalerriineq       |
| Avatangiisinik,<br>sananeqaatinik<br>kiffartuussinernillu<br>allanngineq | Ukiumut<br>sisamariarluni<br>piffissami<br>arfininngorneq 00:00<br>– ataasinngorneq<br>05:00  | 24 tiimit                       | Ulluni suliffiusuni<br>15-ini kalerriineq        |
| Isornartunik<br>tuaviortunik<br>nutarterineq                             | Isumaqatigiissu-<br>tineqassaaq   | Isumaqatigiissu-<br>tineqassaaq | Suliap<br>aallartinnissaa<br>sioqqullugu         |

- Ajutoornerit (pisut):

|  |   |
|--|---|
| Ajutoornerup suunera:  | Piffissap uuma iluani aaqqinneqassaaq                             |
| Ajutoornerit 95,5 pct.-ii ataani allassimasut iluanni aaqqinneqartarput. Qaammammut uuttorneqartut. Ajutoornernut allanut piffissamik immikkut isumaqatigiittoqassaaq. |   |
| Tuaviortut (matusisut)<br>Akunnattut (sulinermi nalaatsortut pisarput)<br>Nalinginnaasut (tulluanngitsut,<br>minnerusumik suliaqarnissamik<br>pisariaqartitsisut)      | 5 tiimit<br>Ullut suliffiusut marluk<br>Ullut suliffiusut sisamat |

Akuersissummik piginnittup ajutoornerit Spillemyndighedip ajutoorutunik nalunaaruteqartarfianut nalunaarutigissavai. Tamanna pillugu piumasaqaatit paasissutissiinerillu Spillemyndighedip nittartagaani tamanut saqqummiunneqarumaarput.

- Akuersissummik piginnittoq SAFE-p ingerlanneqarneranut akisussaavoq.
- SAFE iserfigineqarsinnaanngippat, aningaasanoornermi nalunaarsukkat katersorneqassapput aamma SAFE-mi toqqorneqarlutik piffissap iserfiusinnaanngitsup naanerata kingorna.

## **E. 2. Pinnguaatinik aaqqissuussinermit SAFE-mut aningaasanoornermi nalunaarsukkanik nuussineq**

Akuersissummik piginnittoq Standard Records naapertorlugu aningaasanoornermi nalunaarsukkanik SAFE-mut nuussillunilu toqqorsissaaq (nalunaarsukkat aaqqissugaaneritut

tunngasut paasissutissat). Nalunaarsukkanik nuussinerup taassuma qulakkeerneqarnissaa akuersissummik piginnittup akisussaaffigaa.

Nakkutilliinermi atugassanik Safe-miit Spillemyndighedip nammineq nalunaarsukkanik toqqorsivianut pisariaqartitsineq malillugu Spillemyndighedi aningaasanoornermi nalunaarsukkanik nassiussisinnaassaaq. Nuussineq ingerlanneqassaaq FTPS-imik internettikkut, aamma nalunaarsukkat tatiginartuuneri Tamper Token atorlugu misissorneqassallutik.

### **E. 3 SAFE-mi mappit aaqqissugaaneri aamma Standard Recordsimi taaguusersuineq**

Akuersissummik piginnittoq SAFE-mi mappit aaqqissuutissavai aamma aaqqissugaanerit uku aallaavigalugit Standard Records taaguusersussallugu:

**Qaffasissuseq 1:** Mapiit avalliit atilerneqassapput “Pertiterneqarsinnaasumik aaqqissugaasut-pinnnguaatinik aaqqissuussineq”.

**Qaffasissuseq 2:** Mappi taaguuteqassaaq “Zip”.

**Qaffasissuseq 3:** Tassani ullunut tamanut mappinik pilersitsisoqassaaq, ullui malillugit taaguuserneqartussat YYYY-MM-DD.

**Qaffasissuseq 4:** Tassani zip-filit inissinneqassapput, tamarmik immikkut tokenimut atassuteqartut. Aammattaq tokeninut suli matuneqanngitsunut mappeqassaaq. Mappi suli matuneqanngitsoq, taaguuserneqassaaq "SpilCertifikatIdentifikation-TamperTokenID", mappinik taaguuserneqartunik “SpilCertifikatIdentifikation-TamperTokenID.zip” imaqartoq. SpilCertifikatIdentifikation tassaavoq akuersissummik piginnittoq pillugu kinaassutsimik ilisarnaat immikkuullarissuq, Spillemyndighedimit tunniunneqartoq. tamperTokenID tassaavoq Tamper Tokenit ataasiakkaat kinaassusiinut ilisarnaat immikkuullarissuq.

**Qaffasissuseq 5:** Zip-filit ataasiakkaat tamarmik imaanut naapertuuttunik mappinik pilersitsisoqassaaq. Taakku taaguuteqassapput assersuutigalugu “EndOfDay”, “Jackpot”, “KasinoSpil”, “PokerCachGames” aamma “PokerTurnering”.

**Qaffasissuseq 6:** Ullunut attuumassuteqartunut mappinik pilersitsisoqassaaq, ullui malillugit taaguuserneqartut imatut YYYY-MM-DD. Standard Recordsit ataasiakkaat qaffasissusermi tassani imaluunnit qaffasissuseq 7-imi inissinneqassapput, filip piffissami pilersinneqarfiani pertitikkami inissinneqarlutik.

**Qaffasissuseq 7:** [Qinerneqarsinnaasoq] Piffissakkaartumik mappit ataniittussanik inissiisoqarsinnaavoq imatut iluseqartunik HH. MM-HH.MM.

Pinnguaatinut assigiinngitsunut allanut naleqqiullugu filit pertiterfimmi

naammassineqarfissatut naatsorsuutigisami inissinneqassapput.

Mappinik aamma Standard Recordsinik taaguusersuineq Spillemyndighedip immikkoortiterinera malissavaa.

Aningaasanoornermi nalunaarsukkat mappit aaqqissugaaneranni ingerlaavartumik matuneqartassapput, Tamper Tokenimi matuersaatinut ataasiakkaanut tamanut zip-filimik pilersitsisoqassalluni. Zip-fili ataasiakkaat tamarmik aningaasanoornermi nalunaarsukkanik Tamper Tokenimi matuersaammut atasumut poortorneqartunik imaqassapput.

### **F. akuersissummut piumasagaatit eqqortinneqarnerinik ingerlaavartumik nakkutilliineq**

#### **F. 1 Aningaasanoornermi nalunaarsukkanik pissarsiumaneq**

Akuersissummik piginnittoq piumaffigineqarnermigut digitalikkut atuarneqarsinnaasumi toqqorsivimmiit aningaasanoornermi nalunaarsukkanik toqqorneqarsimasunik, tak. immikkoortoq E.1, ullut suliffiusut tallimat iluanni Spillemyndighedimut tunniussisinnaassaaq.

## **F. 2 Paasissutissanik allanik pissarsiumaneq**

Immikkoortoq E. 1-imi eqqaaneqartut aningaasanoornermi nalunaarsukkat saniatigut akuersissummik piginnittoq nammineq pinnguaatinut aqqissuussaminiit immaqalu tassunga atasunik aqqissuussinerniit paasissutissanik pilersitsisinnaassaaq, tassunga ilanngullugit:

- Illugiilluni sunniiveqatigiiffisani pinnguaatit pillugit paasissutissat, assersuutigalugu pokerimi nallukattat aningaasanoorfigineqartut, attaveqaatit, pinnguaatinik neqerooruteqartunit arlalinniit aningaasanoortut arlallit peqataaffigisaannik aningaasanoortoqarnera apeqqutaatinnagu unamminermi ataatsimi peqataasunut tamarmiusunut tunngasunik paasissutissanik Spillemyndighedi piumasaqarsinnaavoq.
- Aningaasanoornermi kontot pillugit paasissutissat.
- Kisitsisitigut paasissutissani paasissutissat.
- Akuersissummik piginnittup pinnguaatini aqqissuussaani piviusumik nalunaarsorsimasut naqitanngortinneri.

Paasissutissat taakku ullut suliffiusut tallimat qaangiutsinnagit Spillemyndighedimut tunniunneqassapput.

## **G. Akuersissummik piginnittup nakkutilliinera, suleriaasia aqqissugaaneralu pillugu piumasaqaatit**

Akuersissummik piginnittumit taassumalu suleqatigisaani nalunaarummi piumasaqaatit atuuttut eqqortittuarneri pillugit akuersissummik piginnittoq nakkutilliinernik piareersaalluni, uppersaalluni ingerlaavartumik nakkutilliinernik ingerlataqassaaq. Taakku minnerpaamik tassaassapput:

- Sulisunik aqutsisunillu ingerlanneqartut ulluinnarni nakkutilliinerit (sapiingisamik suleriaatsini aqqissuussinernilu ilanngunneqarsimasut)
- Piffissakkaartumik kiisalu misiligutaasumik pitsaassutsinik misissuineq.
- Piumasaqaatit atuuttut eqqortinneqarnerisut uppersarsarniarlugit naammaginarumik qaffasissuseqarnissaq anguniarlugu tamanna pisariaqartinneqaleraangat avataaniit pitsaassutsinik misissuineq.
- Nakkutilliinermi angusanik suliaqarnek toqqorsinerlu.
- Kukkunernik imaluunniit unioqutitsinernik paasisaqarnermi kiisalu akuersissummik piginnittumi namminermi aamma/imaluunniit taassuma suleqatigisaani kukkunerit imaluunniit unioqutitsinerit pillugit pasitsaassaqarnermi ingerlaannartumik Spillemyndighedimut nalunaaruteqarnek. Nalunaaruteqarnermut ilaassapput kukkunerim imaluunniit unioqutitsinermi kingunerisinnaasanik akuersissummik piginnittup naliliinera.

Akuersissummik piginnittumit taassumalu suleqatigisaani nalunaarummi piumasaqaatit atuuttut eqqortittuarnerinik tapersersuisumik qulakkeerisumillu akuersissummik piginnittoq nakkutilliinernik piareersaanermut, uppersaanermut suleriaatsinillu tulluartunik malinninnissamat akisussaavoq. Suleriaatsit minnerpaamik makkuninnga imaqaassapput:

- Pinnguaatini aqqissuussani tamani immikkoortunik tamanik aamma nalunaarsukkanik nassiussinernik nakkutilliinernik akuersissummik piginnittoq

qulakkeerissaaq, tassunga ilanngullugit nalunaarsukkat ingerlaarfii, nalunaarsukkat ataatsimoortut, attaveqaatit, SAFE, RNG, pinnguaatini aaqqissuussinerit il.il. (aamma peqataasumi allami ilanngunneqartumi immikkoortut aamma nalunaarsukkanik nassiussinerit), tatiginartuuneri pissarsiarineqarsinnaanerilu qulakkeerniarlugit.

- Akuersissummik piginnittup nalunaarsukkanik annaasaqarnissaaq illuatungilerniarlugi sillimaniarnermi immiussanik aamma toqqorsineri suleriaatsinik qulakkeerissaaq.
- Akuersissummik piginnittoq ISO 27001 naapertorlugi isumannaatsumik qajannaatsumillu ingerlatsinissaaq pillugu aserfallatsaaliineri sillimaniarnermilu suleriaatsinik qulakkeerissaaq.

Akuersissummik piginnittoq pinnguaatit pillugit inatsimmi siunertaq aamma

Spillemyndighedip piumasaqaataanut naapertuuttumik tunisassiaminik neqerooruteqarneranut naleqqiullugu tulluurtumik aaqqissugaallunilu naammattunik sulisoqassaaq.

Akuersissummik tunniussineq pillugu inatsisimmi piumasarineqartut inissisimanerit sulisunullu tunngasutigut piumasaqaatit saniatigut akuersissummik piginnittoq aaqqissuussaannikkut inissisimanerit uku minnerpaamik pilersissavai:

- Pinnguaatinut softwarenut aamma pinnguaatinik ingerlatsinerimut akisussaaneq, tassunga ilanngullugit pinnguaatit tamarmik akuersissummik piginnittumi taassumalu suleqatigisinnaasaani eqqortumik tatiginartumillu kukkuneqanngitsumik salloqittaannngitsumillu aaqqissuunneqarnerisa ingerlanneqarnerisalu qulakkeerneqarneri.
- Qarasaasiat isumannaatsuunerinut akisussaaneq, tassunga ilanngullugit akuersissummik piginnittumit (aamma akuersissummik piginnittup suleqatigisinnaasanit) atorineqartut qarasaasianik hardwaret, softwaret attaveqaatillu tamarmik isumannaallisaaannikkut illersorneqarsinnaasumik ingerlanneqarnerisa qulakkeerneqarneri.
- Aaqqissuussinernik allannguinerit akisussaaneq, tak. aaqqissuussinernik allanngortitsineri aqutsineq pillugu Spillemyndighedip aaqqissuussinera.
- Pinerlunnikkut aningaasarsiat aningaaserivimmu inissinneqarsimasunik aamma qunuseriarinnikkut aningaasalersuinerit nakkutilliinerimut akisussaaneq, tassunga ilanngullugit nalunaarummi piumasaqaatit eqqortinneqarnerisa qulakkeerneqarneri.
- Aningaasaqarnerimut akisussaaneq, tassunga ilanngullugit aningaasanoornermi akiliutaasunit tamarmiusunit eqqortunik annertussuseqartunik AKILERAARTARFIUP tamatigut tiguisarnerata qulakkeerneqarnera.

Akuersissummik piginnittup immikkoortuni kina akisussaannersoq pillugu

Spillemyndighedimut paasissutissiissaaq.

Inuit akisussaasut inissisimaffimmik akisussaaffimmillu isumaginnissinnaanermut

pisariaqartunik piginnaasaqarlutillu pisariaqartunik misilittagaqassapput. Akuersissummik piginnittup piumasaqaatigineqartunik qulakkeerinissamut aaqqiinernik kiisalu pisariaqartunik allannguinerit naammassineqarnissaannut inuit pisinnaatitaaffeqarneri akuersissummik piginnittup qulakkiissavaa.

Nakkutilliinerimut atatillugu inuit akisussaasut toqqaannartumik attaveqarfigineqartussaapput.

Inuit taamaattumik immikkoortut pineqartut iluanni Spillemyndighedip

piumasaqarfigisinnaasaani paasissutissanik uppernarsaatinillu tamanik tamatigut

pissarsinnaallutillu nassuiaateqarsinnaassapput.